

# 'Tiada tandatangan SD mahu Dr M kekal PM'

BH - 14/2/2020 w/s: 17

Setiausaha Agung PKR anggap dakwaan khabar angin

Oleh Noor Atiqah Sulaiman  
bhnews@bh.com.my



Saifuddin Nasution Ismail

**Putrajaya:** Dakwaan segelintir Ahli Parlimen menandatangani akuan berkanun (SD) menyokong Tun Dr Mahathir Mohamad kekal sebagai Perdana Menteri hingga tamat penggal hanya khabar angin.

Setiausaha Agung PKR, Datuk Seri Saifuddin Nasution Ismail, berkata tiada siapa yang datang kepadanya bagi tujuan itu dan mengetahui hal itu daripada laporan berita yang dibacanya.

"Saya baru saja semalam, tiada dalam pengetahuan kami (tanda-tangan SD), yang saya tahu pada 21 Februari akan diadakan mesyuarat Majlis Presiden Pakatan Harapan (PH) berkemungkinan di Yayasan Kepimpinan Perdana. Kami akan bermesyuarat seperti biasa, itu sahaja yang saya tahu.

"Tiada pun (sesiapa tampil untuk minta tandatangan SD), setakat yang saya semak memang tiada," katanya kepada pemberita selepas menghadiri Sesi Dialog Bersama Industri Mengenai

Impak COVID-19, di kementeriannya, di sini, semalam.

Sementara itu, ketika ditanya sama ada PKR akan mengambil tindakan terhadap ahlinya yang menandatangani SD berkenaan, Saifuddin berkata pihaknya tidak menerima sebarang pengesahan bagi berita itu.

"Tiada pengesahan, ia masih kekal sebagai satu berita seperti dilaporkan. Buat masa ini tiada siapa pun yang tampil. Setakat yang saya tahu, ia hanyalah satu *hearsay* (khabar angin)," katanya.

Kelmarin, portal *Sarawak Report* memetik sumber mendakwa ahli Parlimen dari UMNO, PAS, Parti Pribumi Bersatu Malaysia (BERSATU) dan PKR yang memihak kepada Timbalan Presiden PKR, Datuk Seri Mohamed Azmin Ali digesa untuk ke Kuala Lumpur bagi menandatangani SD itu dalam tempoh 48 jam.

Portal berkenaan turut men-

dakwa, pengumpulan SD terbabit sudah dua kali diadakan dengan SD pertama sudah ditandatangani, namun belum digunakan.

Pada 9 Februari lalu, Dr Mahathir dilaporkan menegaskan bahawa beliau akan menunaikan janji untuk menyerahkan jawatan perdana menteri itu kepada Presiden PKR, Datuk Seri Anwar Ibrahim, tetapi menambah keputusan muktamad terletak kepada Dewan Rakyat.

Dua hari sebelum itu, Anwar memberitahu *REUTERS* bahawa beliau bersedia menunggu enam bulan lagi untuk menjadi perdana menteri dan menyatakan keyakinannya bahawa dia mendapat sokongan PH.

Sementara itu, di Port Dickson, Anwar mengulangi komitmennya menyokong Dr Mahathir dan menyifatkan tindakan pembangkang yang mengusahakan pelbagai cara untuk turut menyatakan sokongan kepada Perdana Menteri sebagai tindakan 'terdesak'.

"Komitmen kami kekal, tiada perubahan dalam PH. Kami terus menyokong Dr Mahathir sebagai PM (Perdana Menteri) ketujuh," katanya.

Beliau yang ditemui pada Majlis Ramah Mesra dan Pelancaran Amalan Guru Penyayang di Sekolah Kebangsaan (SK) Kampung Gelam, di sini, meminta pembangkang memberi ruang kerajaan melaksanakan tugas yang lebih penting.